

Rinforzar ils centers regiunals e turistics

Rapport davart il svilup economic en il chantun Grischun

■ **(anr/fa) Avant la revisiun da la lescha davart la promoziun economica ha cumpilà la regenza grischuna in rapport cumplexiv. Pais vul ella dar vinavant a l'economia orientada a l'export, tranter quel er il turissem.** Il zercladur 2013 ha la regenza suspais la revisiun totala currenta da la lescha per promover il svilup economic a favur da l'elavuraziun d'in rapport cumplexiv davart il svilup economic en il chantun Grischun. «Quest rapport interdepartamental dat ina survista cumplexiva davart il svilup economic dal chantun e mussa il svilup en ils singuls secturs politics e las finamiras per il futur», ha ditg cusseglier guvernativ *Hansjörg Trachsel* venderdi a chaschun d'ina conferenza da pressa. La strategia da la regenza areguard la politica economica per la proxima perioda da program vegn preschenta en il rom dal program da la regenza 2017–2020, e quai resguardond questas finamiras.

«Teoria da la basa d'export en il center»

«Il svilup economic en il senn pli stretg sa basa sin la lescha per promover il svilup economic, entant ch'il svilup economic en il senn pli general sa referecha a la promoziun en il rom dals secturs politics», ha declarà Trachsel. Areguard il svilup economic en il senn pli stretg sa tegna la regenza vi dal princip da la promoziun che sa basa sin la teoria da la basa d'export. «Quai signifitga daners che arrivon da l'extern, dad



Sandra Felix, la secretaria dal departament, e cusseglier guvernativ Hansjörg Trachsel cun il rapport gist deliberà.

FOTO F. ANDRY

auters chantuns u da l'ester, en il Grischun», ha ditg il cusseglier guvernativ, «per products industrials, ma era per purschidas turisticas u dal sectur da sanadad.» Da mesiras che mantegnan las structures sco il sustegn da sanaziuns u ina promoziun explicitamain pli ferma da territoris economicamain pli debels vul ella desister er vinavant. Ultra da quai duai vegnir renunzià en il futur a

la promoziun da manaschis singuls en il sectur da l'industria e dal mastergn sco ch'igl è pussaivel fin ussa.

«In criteri è la creaziun da novas piazzas da lavur»

La regenza insista sin sia strategia da rinforzar centers regiunals. En vista a las consequenzas da l'iniziativa cunter las abitaziuns secundaras ed ulteriurs svi-

lups dastgass l'impurtanza dal turissem en il territori da muntogna anc crescher. La promoziun dal svilup economic en quests territoris è perquai savens er colliada cun il sustegn d'activitads e d'infrastructures turisticas. «Per pudair dar impuls, en spezial en il sectur da l'infrastructura turistica centrala e tar las infrastructures d'alloschament, è tenor la regenza necessaria ina summa da 50 fin 80 milliuns francs», ha ditg Trachsel, «ils meds finansials che duessian vegnir mess a disposiziun vegnian limitads a duas periodas da legislatura per ch'ils projects possian vegnir iniziads e realisads svelts.» Ils criteris decisivs per il sustegn èn tenor Trachsel «l'augment da la valorisaziun sur il project sustegni or e la creaziun da piazzas da lavur». Ultra da quai stoppia la purschida da vendita esser esclusiva.

«Basegn da discussiun objectiva»

La regenza preschenta finamiras progressivas en differents secturs politics. La soluziun premetta tenor Trachsel da far frunt en moda activa e constructiva a process da reduziun che han oramai lieu. La regenza premetta la prontezza da metter accents e prioritads ed il curaschi da prender mesiras rigurusas. «Ina situaziun da partenza che fa grondas pretensiuns als differents plauns politics e che po mo purtar ina soluziun progressiva sch'igl ha lieu ina discussiun objectiva», ha concludì Hansjörg Trachsel. Il cussegli grond vegn a tractar il rapport da la regenza en la sessiun d'october 2014.

Analisa dal svilup economic

Malgrà che las ratas da creschientscha dal product naziunal brut èn s'augmentadas e la dischoccupaziun è bassa sa mussa il svilup economic en il Grischun pauc dinamic. En tut è dapi la mesadad dals onns novanta la differenza tranter la creschientscha economica en il Grischun ed en Svizra vegnida adina pli gronda. Er entaifer il chantun sa mussan differenzas considerablas tranter las singulas regiuns. Ils motivs èn la midada da las structures agricolas e, cumbinà cun quella, l'aboliziun da piazzas da lavur en las regiuns perifericas sco er la reduziun da las frequenzas turisticas. Quels motivs influenzeschan en bleras regiuns directamain il svilup economic general perquai ch'i manca là la diversificaziun. Singuls territoris en il Grischun che dependan per il solit main ferm dal turissem pon registrar ratas da creschientscha medias en la cumparegliaziun naziunala. Quai resulta cunzunt dal svilup en general bun da l'industria grischuna e da la creschientscha dal sectur public.